

# Propaganda per natira e products

La regiun Stussavgia-Ruinaulta ha lantschau il project «Faszinatur»

■ (anr/hh) Questa fin d'jamna han ils emprems dis da «Faszinatur» liug el-la regiun Stussavgia-Ruinaulta. Cun quels vulan ils iniziants presentar al turissem la natira intacta e leutier propagar ils products indigens. Dapi dus onns lavura la Fundaziun Valendau Impuls vid il project «Faszinatur». La finamira ed igl intent da quel ei da fascinar giuven e vegl da lunsch e da maneivel per la natira varionta, svegliar ils senns ed il plascher per la cuntrada muntagnarda. La regiun Stussavgia-Ruinaulta sestenda da 600 entochen sin 2752 meters sur mar sil Péz Riein. Ella ei signada da differentes scalems d'altezia e da spazi da viver per rodond 700 specias da plontas ed animals. Dapi biaras generaziuns vegn quei spazi da viver tgiraus. Quellas stentas e quella savida vul il project intermediar. Grazia alla prefinanziaziun dallas empremas lavurs entras la Fundaziun Accentus san ils iniziants presentar uss alla publicitad ina homepage che fa quella natira accessibla a moda digitala, denter auter alla tscherca dallas differentes specias da plontas ed animals dalla regiun. Quella part vulan ils iniziants extender, denter auter cun sustegn dils indigens, scolars, persunas dil fatg ed auters interessents.



Il project «Faszinatur» duei presentar la natira als visitaders, mo era promover la vendita da products indigens.

## Plivalur per la regiun

Sco l'ustria «Gasthaus am Brunnen» ch'ei vegnida aivarta dacuort duei era il project «Faszinatur» generar egl avegnir novas entradas alla regiun, en special allas puras ed als purs, mo era guides che meinan gruppas ella natira. En quei senn ei gia vegniu instradau in project da pilot cun jarvas e flurs indigenas. Quellas duein numnadamein vegnir pachetadas a satgets da te. La nova ustria retila ils products per sias tratgas directamein mintga di da producentas e producents indigens. Ils hosps vegnan informai cul num dils producents. Per la partenza dil project «Faszinatur» san indigens e hosps da vacanzas concepir ils treis dis vegnents (25 entochen 27 da fenadur 2014) ord 15 purschidas differentas in program individual. Il spectrum cumpeggia il mund dallas tschittas, dils aviuls, dalla puma e dallas alps entochen ad ina excursiun cun investa dad jarvas, in cuors da malegiar ella natira, ina viadi scientific ella natira per affons e la purschida dall'ustria. Ils organisaturs supplicheschan da serender el liug cun mieds dil traffic public. La sonda meina in bus gratuit dalla staziun da viafier da Valendau-Sagogn el center dil vitg da Valendau. Parcadis stattan a disposiziun sper la casa da scola a Valendau.

MAD